

Proyecto renobacion y expansion di dr. Horacio Oduber Hospital a keda aproba den Parlamento

Minister Mike de Meza "Construccion ta bay cuminsa pronto"



DESPUES di e reunion turbulento den Parlamento di Aruba na unda durante dos dia largo a trata e proyecto renobacion y ampliacion di dr. Horacio Oduber Hospital, Minister di Finanza Mike de Meza a duna un splicacion na prensa entorno e proyecto dinamico aki. Dos dia di debatenan fuerte tabata necesario pa diaranson anochi Parlamento duna gobierno aprobacion pa firma e cambio di ley pa loke ta e acuerdo cu SOGA (Stichting Onroerend Goed) den caso di renobacion y expansion di hospital. Esaki a keda aproba cu 14 voto na favor y 4 contra. Fraccion di

AVP a sostene e proyecto hunto cu Andin Bikker di PDR y Sra. Mervin Wyatt-Ras (miembro independiente). Sra. Xiomara Maduro-Ruiz, Ady Thijsen, Arondino Croes di MEP y miembro independiente Booshi Wever a vota contra expansion y renobacion di dr. Horacio Oduber Hospital. Lider di MEP Sra. Evelyn Wever-Croes no tabata presente ni tampoco su colega Edison Briesen ni pa atende e reunion tampoco pa votacion. Sra. Marisol Lopez-Tromp ta den exterior pa motibonan valido. Entre e conseheronan di gobierno tabata presente tambe den sala di Parlamento gerencia

di hospital.

Minister de Meza "Nos ta masha contento di a haya aprobacion di casi 80% di esunnan presente den Parlamento pa e proyecto aki". De Meza a splica cu fraccion di AVP no solamente a sostene e cambio di ley cu tabata necesario pa renobacion y ampliacion di hospital, pero a bin cu un amienda tambe. Minister a bisa di ta lamenta cu ni lider di MEP ni Edison Briesen tabata presente ningun di e dos dianan ora tabata trata un proyecto asina importante pa Aruba. Minister ta satisfecho con gobierno den forma cla y transparente a trece su

puntonan dilanti. "Esaki ta un proyecto hopi necesario pa Aruba". Dr. Horacio Oduber Hospital a wordo construi casi 40 aña pasa. Den un tempo cu Aruba tabatin mita di e cantidad di habitante cu e tin awe y turismo tabata consisti di alrededor di 200 mil turista pa aña compara cu awe na unda 1.6 miyon turista ta bishita nos isla. Ta pesey cu e necesidad pa un hospital mas grandi na unda por brinda miho calidad di cuida ta grandi. Minister a splica cu e discusion pa sea amplia, renoba of construi un hospital nobo ta un discusion di basta aña caba.

"Nos tin apenas tres aña den gobierno y ya nos por presenta un pakete total pa mehora nos hospital y a haya aprobacion pa esaki. Asina cu e huurovereenkomst entre gobierno di Aruba y SOGA keda cla, nos por bay over na destaho publico pasobra cu e trabou di e arkitectonan ta cla. Esaki kier men cu construccion por cuminsa pronto". De Meza a felicita su colega Minister Visser, kende ta un di e motornan tras di e proyecto aki, meskos tambe su colega Minister di Infraestructura Benny Sevinger y Minister Presidente Mike Eman, kende semper a duna hopi sosten na e proyecto esencial aki.